



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 6



China-i Australia tsür
Cheng Lei chiokogo



Mizoram Speaker Lalrinliana
Sailo-i BJP nung adener

VOL. XXI NO. 05 (ADOK 05) DIMAPUR YANGTEPNÜ (THURSDAY) MONGPUTENI (OCTOBER) 12, 2023 ₹ 5.00

ECI ketdangsürtemi Nagaland semdang

Kohima, October 11, 2023 (DIPR): Election Commission of India (ECI) ketdangsürtemi anogo ananü atema Nagaland semdangi arua lir.

ECI Principal Secretary Arvind Anand aser Secretary Santosh Kumar Dubey na Bodbarnü Nagaland tonga aru.

Nagaland nung Special Summary Revision of Electoral Rolls, EVM & VVPAT machines First Level Checking (FLC) aser Parliamentary Election, 2024 atema maparen inyakba reprangdangtsü atema ECI ketdangsürtem aru.

October 11, 2023 nü ECI

ketdangsürtemi Dimapur, Chumoukedima aser Kohima District tem nung DEOs, EROs, AEROs, Supervisors aser BLOs den senden balala amen.

October 12, 2023 nü parnoki Kohima jila nung polling stations balala sema senzüsü aser iba sülen anepdang 10:00 ako nungi Hotel Japfu Kohima District Election Officers den senden ka amentsü.

ECI ketdangsürtemisa asüng anüingdang Kohima aser Tsemnyu District tem nung FLC activities repranga aotsü ta Chief Electoral Officer (O) Ruokuovituo Khezhie-i ashi.

NEIPF-i lanur lisopurtem anitetsü



Dimapur, October 11, 2023 (TYO): October 11, 2023 nü Itanagar nung North East Indigenous People's Forum (NEIPF) sanen luden senden menogo.

Senden nung North Eastern Region nung aliba lisopurtem tebilemsütem benoka lemsatap. World Indigenous Day indang omen nung ajemdaker NEIPF-i lanurtem asoshi sentongtem ayonga agitsü bangjemtep.

NEIPF-i lanurtem shilem agitsü nungdak ta angateta State Chapters tashi itshitsü aser 'Climate action and Green Transition for Justice', 'Mobilising for Justice' o 'Intergenerational Connection' dak rangloker mapa inyaktsü.

NEIPF-i kaketshirtem aser lanurtem atema Essay Writing Competition ka ayonga agitsü. Lisopurtem pei pei sobaliba kümzüka aser wazüka ayutsü tangatetba lidaktsütsü atema parnoki sentong balala agitsü.

NEIPF-isa Northeast nung lipoküm wazüka ayutsü mepishia metetdaksü. Parnokisa poppy alu ayimba ajanga lanuputu asoshi lendong bentsür aruba khuret lemsatap.

POSCO kübok nisung ka küm 20 tepuokdak ayutsü

Dimapur, October 11, 2023 (TYO): Nagaland nung tanur tetsür ka dak tashiyim agi shi nung medemba atema küm 200 tepuokdak ayutsü temerenshi agitsüogo.

Iba temerenshi ya Protection of Children Against Sexual Offences Act (POCSO), Phek Special Judge Neiko Akami-i Kukuto Shijoh (25) nem agitsü.

December 13, 2022 nü arishi küm 11 tanur tetsür ka aser lar medemertem aremi süng abeni aodang Kukuto-i la dak tashiyim agi shi nung medem. Iba tatalokba sülen Kukuto-i pa sasa Chozuba Women Police station, Phek nung bendanga agitsü.

POSCO Special Court-isa tanutsüla nem Rs 1 lakh agitsütsü tetuyuba agitsüogo.

Vigilance Committee NCD aser Dimapur CSOs-i public atema ola adoker

Dimapur, October 11, 2023 (TYO): Naga Council Dimapur Vigilance Committee den Dimapur nung Civil Society Organisations (CSOs)-i bangdakpur den Dimapur nung public tebilemsütem lemsatapa teinyaktsü tim inyaktsü mepishiogo.

Dimapur nung amenoka aliba CSOs aser NCD Vigilance Committee-i temepishiba agütsüba sorkar department tem, dokan kiburtem aser nija school temi mapa inyaktsü metetdaksür. Ashiba ama meinyakra CSOs-i lungkak aittsü aser ajak ajungtsü atema mapa inyaka aotsü, ta parnoki metetdaksü.

Dimapur CSOs aser NCD Vigilance Committee-i Director General of Police, Nagaland Rupin Sharma IPS dang Dimapur nung lanur aser kaketshirtemi drug achiba anema inyaktsü aser iba khuret agientsü metetdaksüogo.

"DGP, Nagaland-i police rongnung drugs achirtem dak tapet mapa inyakba atema tenüngsang agitsü. Dimapur

nunga drugs achirtem dak kasa mapa inyaktsü mepishir" ta Vigilance Committee, NCD Convener Joseph Lemtur aser Co-Convener Hotoshe Sumi nati sangdong ka nung ashi.

Parnokisa bangdak department dang Dimapur jila aser temeket lenmangtem yanglushitsü metetdaksüogo.

Gari lenmang majungba ajanga senzüsönbonger aser school tanurtemi timtem kanga ajurur, ta Dimapur nung aliba CSOs-i metetdaksü.

Dimapur nung alirtem ajangzüksü aser maongka angutsü atema bangdak Department dang Forest Colony nung aliba Shopping Mall tangsa lapoktsü metetdaksür, ta CSOs-isa ashi.

Dimapur Market lenmangtem nung ki kiburtem aser dokan kiburtemi anepdang nungi aonung tashi gari anena mayutsüla kechiyong iba ajanga shishilembai arurtemi timtem kanga ajurur ta parnokisa metetdaksüogo.

Holy Cross Hr. Sec. School, Dimapur; Christian Hr. Sec.

School, Dimapur; St. Mary Hr. Sec. School, Dimapur aser Little Star Hr. Sec. School, Dimapur nung Managing Board temi pei pei school compound nung kaketshirtem anir senzüba garitem anentsü atema tawa ayutsü metetdaksür ta Dimapur CSOs-isa ashi.

Dimapur jila nung traffic khuret ajemtsü atema school tanur anishirtemi lenmang nung gari manentsü mepishir ta parnokisa ashi.

October 7, 2023 nü NCD Vigilance Committee-i Dimapur Naga Students' Union, Dimapur Urban Colonies' Chairmen Federation, Naga Women Hoho Dimapur, ACAUT, BAN, GBs Union Sadar Dimapur, Dimapur District GBs Association, DCCI, Non-Naga Representatives, East Dimapur GBs Union, East Dimapur Business Association, Eastern Naga Students' Union Dimapur aser Dimapur District Citizens' Forum den senden amendang item lemtet agia liasü ta Joseph Lemtur aser Hotoshe Sumi nati sangdong nungsa shia lir.

Israel nung "Emergency Unity Government" tentetogo

Jerusalem, October 11, 2023 (Agencies): Bodbarnü Israel nung "emergency unity government" ka kümtetogo.

Prime Minister Benjamin Netanyahu-i taoba defence minister aser opposition party lennir Benny Gantz den war cabinet ka tentetsü mulungtep, ta National Unity party ajanga metetdaksü.

Honibarnü Gaza nungi Hamas kiralongrartemi Israel amakba sülen tang tashi nung nisung 1,200 tema süogo aser 2,700

tema yirua lir ta Israeli Defence Forces-i metetdaksü.

Külen, Hamas armed wing Al Qassam Brigades-i Bodbarnü parnok Israel telung nung maneni rarar ta osang metetdaksüogo.

Israel-i Gaza strip amakdang nisung 1,055 tepsetogo aser 5,184 yirutsü ta Palestine ketdangsürtemi ashi.

Tasürtem rongnung Palestinian refugee agency nung inyaker U.N. staff 9 densema liasü ta United Nations-ia ashi.

Yasüng onoki Gaza City nung

Hamas ajanga amshiba tesem 200 tema makdokogo ta IDF-i ashi.

"Onoki anüng nungi raratsü tenzükgogo aser yaser ali nungi raratsü" ta Defence Minister Yoav Gallant-i Mongulbarnü ashi.

Israel-i Gaza ya "total siege" nung yua lir aser nisung million 2.3 alidaki chiyungtsü aser totzü meyoker.

Bodbarnü power station ka dang aliba mapa meinyaki akümba ajanga electricity mali kümogogo ta Hamas media-ia metetdaksü.

Kisama nung Tsonglak Nyi benjong amung



Bambo Hall, Kisama nung October 11, 2023 nü Tsonglak Nyi benjong amungdang Kiuti Khea Tsin Rechip Clutural Troupe ajanga tsüngsangba mapang tangokba noksa nung angur.

Dimapur, Mongputeni/Oct. 11 (TYO): Tikhir Union Kohima ajanga October 11, 2023 nü Bambo Hall, Naga Heritage Village, Kisama nung Tsonglak Nyi benjong munga liasü, kong Minister, Housing & Mechanical Engineering, P. Bashangmongba Chang tenüng nung pa kinungtsü Special Transport Officer, Alembin tesemdang tongti ka ama dena liasü.

Iba sentong nung jembidang Alembin-i Tikhir nüburtem den benjong salem lemsatap, shirnok Tsonglak Nyi benjong tepela aser temoatsü lemsateptsü adenshia liasü.

Benjongbentsü, sobaliba aser oshiooben balala ajanga Naga nung ayak tali jangjar aser

meteter, ta lai ashi.

Naga nung benjongbentsü nung tongtipangtibaji kidanger yimtsüngtem den tesendaktep tali akangshiba aser tataok agütsütepba lir, ta lai ashi.

James Khulu Tikhir NCS, Under Secretary, Home Department ajanga iba benjongmung ratet ashidang, Tikhir kin asoshi benjongbentsü balala rongnung Tsonglak Nyi ya tongtipangtiba lir, ta ashi.

Ibai kümshi October 9 nungi 12 tashi amunger. Tsonglak Nyi ya ojang ana agi akumba lir. Tsong tetetzü jong aser Lak tetetzü meshitetba, anungi Tsonglak Nyi ya jing meshitetba indang benjong ka lir.

Iba tetetzü mangko bushiba

mapang nok-nü meshitetba mestira teburtem shikari maodang meshitetba indang lir.

Yimtsüng nung tekolakbai küm shia iba benjongmung indang anogo asem jelia nüburtem dang sangdonger. Chiyongtsü, tatsüksü süng aser yi amala nungdakba anepalua aser rizünga ayutsü mechi iba sangdong ya agitsü.

Iba sentong nung OSD to Chief Minister, Kiusumong Tikhir-i o tatsüka jembia aser Tikhir Union Kohima tir T. Tsuthong-i pela agizükba o jembia liasü.

Y.T Tsinthong Pastor TBCK ajanga Tsüngrem temoatsü jazüka sarasadem aser Executive Chairman (TUK) T. L Kiusumong Tikhir ajanga melepzüng o jembia liasü.

Nagaland Secretariat Service pur lokti senden amen



Nagaland Secretariat Service 52 buba batch introductory programme aser lokti senden October 11, 2023 nü Secretariat Conference Hall, Kohima nung agidang tangokba noksa ka yangi angur.

Dimapur, Mongputeni/Oct. 11 (TYO):

Nagaland Secretariat Service 52 buba batch introductory programme aser lokti senden October 11, 2023 nü Secretariat Conference Hall, Kohima nung agia liasü.

Secretary AH &VS, Y Renbothung Tsopoe-i züngsem tassenpur Nagaland Secretariat Service nung pelashishia agizükba mapang, Nagaland Civil Secretariat ya Nagaland nung state sorkar asoshi tezü tongtipangtiba mesüra administrative tesepe ka lir, aser secretariat nung NSS cadres ya tongtoret lir, ta ashi.

Pai züngsemtem dang tajungtiba nung bendanga agütsür mapa inyaksü, office-i teti arutsü aser tongtipang osangtsüsang, office sangdong aser totuyubatem meteta alitsü

ayongzük. Nübur tenzüksü ya sorkar mapa inyaker ajak indang omen asütsüla, kechiaser asenok ajak aji inyaksü sorkari shim, ta Tsopoe-i ashi.

Paisa sorkar totuyuba sülen anidaksü aser sorkar nem mapa tajungtiba agütsütsü asoshi training sentongtem mezüdoki adentsü ayongzüka liasü.

NSSA tir Chubasangla Longkumer-i tarur pela agizükba o jembidang maparen ajak pei-i anir tenzüksü aser yimya tassen amshitsü züngsemtem ajungshia liasü.

Züngsemtemi files tem dang masü danga mapatema inyaksüla, yimya tassen angazüktsü jangra alitsüla aser kong lidir liaka temolung agüja inyaksüla, ta lai ashi.

Laisa 'Mekhela Wednesday' sentong indang rateta ashidang, iba yimya ya Nagaland Civil Secretariat alema oa amshir, ta ashi aser tetsürtem dang maneni iba yimya agizüktsü ayongzüka liasü.

Lai teburtem danga Bodhbar anogo nungbo sobaliba dak sendakba sübosolemsü karbo agitsü ayongzüka liasü.

NSS batch tassenba nungi Vedezo Nienu-i jembidang, iba mapa tajung inyaksü maongka ngutetba asoshi tejak tenteter, ta ashi.

NSSA executive züngsem temi batch tassenpur agizükba sentong tulu ayongzükba atema pai pelaba lemsatepa liasü.

Iba sentong nung menden Assistant Secretary NSSA, Hosea Seb liasü aser NSSA music club ajanga temeja ken ka aten.

Mica khen amshir kelen ano tajangzük nguteta amshitsü tuyuba sentong aka



(Abelen) Mica khen amshir kelen ano tajangzük nguteta amshitsü tuyuba sentong nung EAC Mokokchung Abeniuo Jasmine Ashao-i jembir (Achiji) aser sentong nung adeneritem tangokba noksa.

Mokokchung, Mongputeni/October 11(TYO):

Tanu Mokokchung Deputy Commissioner Conference Hall nung Earth Alliance teloki ayongzüka Mica tapu balala Multi Layered Plastics(MLP's) aser Single Used Plastics(SUP's) khen amshir alibatem alima janatsüsa mashi mashi meindoki koda timi tajangzük nguteta anepalua amshitsü iba indang tetuyuba agutsüba sentong ka agiogo.

Tanu iba sentong nung Extra Assistant Commissioner, Mokokchung Abeniuo Jasmine Ashao-i tayongzükba o tatsüka jembidang nüburtemi Mica agi alepa renemer aliba juice alia

ajemer aser ano chips alia chir kelen teküp mashi mashi indokba ajanga alima janar aser ibaji ajanga meyiper asenok tim atemer, anungji asenok MLP's aser SUP's amshir kelen tajangzük agitetsüsa amshitsü kanga tongtipang lirta ashi.

Extra Assistant Commissioner, Mokokchung Abeniuo-isa Nagaland State nung Mokokchungbo kanga dang merük merüker sakasa ano tali temerükba ayutsü asoshi ajaki tongti shilem agia inyaksülata sentong nung dena alirtem ayongzük

Sentong nungsa Earth Alliance, Founder Thangi Mannen ajanga iba sentong

akaba nüngtem rateta ashi,Clean Mokokchung Campaign nungi Limaonen-i jembia aser Mumbai Sustainable Center, Founder Rishi Aggarwal ajanga India tesem balala nung MLP's aser SUP's amshir kelen tajangzük agitetsüsa inyakbatem noksa sayuba ajanga tesentepertem den lemsatep aser Convenor,Earth Alliance Mokokchung Temjensangla sentong nung arua adener ajak den tepelaba o shir kelen tembang.

Tanü iba sentong nung Mokokchung nung aliba school 17 nungi aruagi dena tangazükba agia liasü.



Mokokchung, Mongputeni/October 11(TYO): District Dobashi Costumary Law Court Mokokchung nung tanu Mokokchung Dobashi-tem aser Aoli tekong terok nungi Tsükong terok nung ketdangpur tsüngda shisa lemsatepa kati ka ajungshitepba mensem sentong ka kaogo. Iba sentong nung Dobashitem aser Tsükong lenirtem teti amalitepa shisa agitepa alitsü tangatetba lemsatep ta Distict Head Dobashi Imolangba ajanga metetdaksü.

Kaket reju tekolakpur nem online training agütsü

Dimapur, Mongputeni/Oct. 11 (TYO):

Nagaland Board of School Education (NBSE) kübok register süa aliba kaket reju tekolakpur ajunga asoshi "School Leadership for Inclusive Education" nung online training sentong ka October 10, 2023 nü agia liasü.

Iba training ya ghonda ana agi aser iba mapang 'Inclusion and Inclusive Education from a school leader's perspective' onük nung ajemdaker training agüja liasü.

Iba training nung shisalen sayur ya Ummeed Child Development Centre (Ummeed CDC) aser Keystone Education Society liasü.

Iba training nung shisalen sayuri school nung lenir ka asoshi nungdakba yimya, shisatsü aser sempet tem rateta ashi.

Iba mapang school temi ajuruba timtem aser tayongzükba tem lemsatepa jembia liasü.

Inclusive education ya

tangazüker balala den temelenshi alitsüsa sayuba yimyatem lir, aser angazüktsü asoshi maongka kasa agütsür.

National Education Policy (NEP) 2020 nunga shisalak temelenshi asoshi inclusive education amshitsü jembia lir.

Ummeed Child Development Centre ya non-profit organization ka lir, aser linük nung NGOs tem rongnung tajungtiba ka lir aser parnoki matamabensai aliba tanurtem asoshi mapa tajung inyakba kuli tejangja jenti lir.

Keystone Education Society ya non-profit organization ka lir, aser parnoki angazükba tsütsü dangar memenep aliba kaketshir nem special education teyari agütsür.

Yimya, sempet aser jenjang balala nungi kaketshir nem parnoki angazüktsü maongka kasa agütsütsü meranger.

Iba training sentong nung Heads of Institutions 407 dena liasü.

Rüzhühkrie GHSS Kohima nung Self Defence Class tenzükogo



Dimapur, Mongputeni/Oct. 11 (TYO):

International Day of Girl Child nüngtem nung "Beti Bachao Beti Padhao" kübok "Invest in Girls' Rights: our leadership, our well-being" omen nung ajemdaker Rüzhühkrie Govt. Hr. Secondary School, Kohima nung October 11, 2023 nü Self Defence Class tenzükba liasü.

Iba class tenzükba sentong nung jembidang Deputy Commissioner Kohima, Shanavas C, IAS-i ashiba agi, tetsürchanurtem takum nung temolung agüja iba mera ya linük tesem ajungalen tenzüker.

Danga state tem den medemdangra Nagaland ya tetsürtem asoshi tetsübotsü maketba state ka lir, kechiaser danga state tem nungbo tetsür masodang raksa indoker mesüra tepseter aser tetsürchanu mesüra tetsür takum lendong nung yutsür, ta pai ashi.

Tetsürchanu takum ya külem teburchanu den kasa lir ta nüburtem nem angatetdaksütsü mechi iba campaign ya ayongzük, ta ashi.

Pei sasa pei kumzükba alitsü atema manger-mesangwa tsüngta mangazüktsütsü saka ita aser küm aika bendanga agütsür training agiba ajanga kumzükba litettsü, ta DC Kohima ajanga ashi.

Pai kaketshirtem dang teimla alitsü aser pei sasa pei dak

tamang akatsü aser pei sasa pei kumzükba alitsü training nung tajungtiba agi adentsü ajungshia liasü.

Pai kaketshirtem dang tezü atangba nem mokokdaksütsü saka temolungtetba tulu nung training agitsü ajungshia aser iba ya ajanga tarutsü putu asoshi nükrangdong akumtsü ayongzükba liasü.

Iba sentong nung tarur pela agizükba o jembidang, iba training yagi tetsür kaketshirtem temolung ulutsü aser pei temeden meteta lendong timtem balala nungi kumzükba litettsü, ta Lebu Krose, Principal, Zühkühkrie GHSS ajanga ashi.

Sentong tenzükba Rüzhühkrie GHSS nungi tesayur Thechano-i Tsüngrem temoatsü meshia sarasadem, aser menden Moasunep K. Jingru, EAC & Nodal Officer, Mission Shakti, Kohima ajanga iba campaign indang tongmelang agi lemsatepa liasü.

Iba sentong ya Kohima District Administration ajanga Performing Art with Fitness (PAWF) aser District Hub for Empowerment of Women, Kohima den lungjemer ayongzükba liasü.

Team expert ya PAWF nungi Managing Director, Tainla Temjen-i anir liasü. Iba sentong nung Dr. N. Kire Hr. Secondary School, Seikhazuo, Kohima nungi kaketshirtema dena liasü.

My Handloom. My Pride
"Khadi for Nation, Khadi for Fashion"

Do visit us at the
STATE HANDLOOM EXPO (SHE)-HATHKARGHA MELA
IN COMMEMORATION WITH CELEBRATION OF
KHADI & HANDLOOM MAHOTSAV FOR THE MONTH
OF OCTOBER 2023

11:00 am - 6:00 pm
AT URBAN HAAT DIMAPUR, NAGALAND

ENTRY FREE

09th-22nd OCTOBER 2023

PARTICIPANTS FROM VARIOUS STATES OF INDIA

ORGANISED BY:
Nagaland Handloom & Handicrafts
Development Corporation LTD.
Half Nagarjan, Dimapur, Nagaland

SPONSORED BY:
Office of the Development Commissioner
for Handlooms, Ministry of Textiles,
Govt. of India, New Delhi

ALONG WITH OTHER SPECIAL ATTRACTIONS.....

TAMBOLA GAME
EVERY EVENING

DELICIOUS FOOD COURT
AVAILABLE EVERY EVENING

TIMING:
2 P.M. to 6 P.M.

Assembly nung Caste Survey osang metetdaksütsü: Bihar CM Nitish Kumar

Patna, October 11 (Agencies): Bodhbarnü Bihar Chief Minister, Nitish Kumar-i, state nung caste survey agiba ajanga bushitetba osang balala taruba state assembly nung metetdaksütsü, ta ashi.

Socialist lenir, Jayaprakash Narayan asoba anogomong nungtem nung ayongzükba sentong ka tembangba sülen osangbenertem den jembidang pai iba osangji metetdaksü.

1970s mapang Nitish Kumar engineering azüingba mapang nung yimtenren nung ajemoktsü atema Jayaprakash Narayan ajanga pa ajungmesoa lir.

Kumar-i, "Asenoki inyaktetba (caste survey agiba) ya linük tesem ajaklen jembidar. Tang ano maneni mera agia kibongtem nung rongsenketsüing jenjang osang densema osang balala metetdaksütsü. Taruba assembly nung item osangji metetdaksütsü," ta ashi.

Osangbenertem JD(U) lenir Kumar dang, caste survey ajanga state nung nütsüing shilem asemsü nungi shilem anabo OBCs aser Extremely Backward Classes (EBCs) lir ta sangdongogo, anungji nütsüing sasep nung

parnok nem menden (osangbenertem) parnok mapaji sadem-sadema inyaktettsü," ta pai metetdaksü.

Tan ita tetenzüklen Bihar sorkari caste census report sayaa liasü; state nung nütsüing shilem 63 bo Other Backward Classes (OBCs) aser Extremely Backward Classes (EBCs) lir; nütsüing shilem 27.13 backward class, nütsüing shilem 36.01 kanga backward class aser nütsüing shilem 15.52 general category nung lir, ta iba survey ajanga bushitetba liasü.

State nung nütsüing shilem 81.99 Hindu nunger lir aser nütsüing shilem 17.70 Muslim nunger lir. Scheduled Caste (SC) nütsüing shilem 19.65, Musahars nütsüing shilem 3 aser Brahmins nütsüing shilem 3.65 lir; hristantem, Sikhs, Jains aser Tsüingrem dak mamangertem nütsüing ishika dang lir; parnok ajak senteper nütsüing shilem 1 den tajemba lir.

Centre nung Narendra Modi-i aniba sorkari, linük census nung SCs aser STs dak alaka tanga caste census bo magitsü, ta sangdongba sülen kum ka shi lir Bihar state sorkari caste census agia iba osang sangdongogo.

Iba tasüingdangbaji langzüdang Kumar-i, "Tang iba atema jembitsüji tim masü," ta tongmelang agi dang langzü.

Supreme Court-i reservations atema shilem 50 tashi latetja aliba agienadokogo, anungji Economically Weaker Section (EWS) aser loktiliba telok ajak nem nütsüing sasep nung menden lemzüktsür.

Osangbenertemisa pa dang, RJD nung "MY" (Muslim-Yadav) nungertem ajangzükdaksütsü atema caste survey ya agi ta BJP-i aitsür, süra nai-a kechi ashir?, ta asüingdangba langzüdang Kumar-i, BJP-i jembibaji ni angashiogo saka kecha langzüsü menüingdak, kechiyong Centre nung tashi aliba ajanga parnoki media amokbangogo, ta ashi.

"Ni kaketshir asüba mapang nungi ni osangkakettem zünga liasü saka iba kuli ya ajanga ni joko osangkakettem-a mezüingner. Ajisüaka osangbenertem shisa mebulutsüla, kechiyong onoki tang aliba (Centre) sorkar atsüingdokba sülenbo parnoki

Israel-Palestine tensa atema MEA-i Control Room amenoker

New Delhi, Mongputeni/October 11 (Agencies): Tang Israel aser Palestine na tsüingda raraba tensa nung ajemdaker Ministry of External Affairs (MEA)-i control room ka amenokogo; control room nungjagi tensa asadanga osangtsüsang metetdaksüba den külemi teyari agütsütsü.

New Delhi nung control room indang contacts ji: 1800118797 (Toll-free), +91-11 23012113, +91-11-23014104, +91-11-23017905, +919968291988, situationroom@mea.gov.in lir, ta MEA-i sangdong ka ajanga metetdaksü.

Ano külen Tel Aviv nung Indian Embassy-ia 24-hour emergency helpline ka tenzükogo aser item numbers-+972-35226748, +972-5 4 3 2 7 8 3 9 2 , cons1.telaviv@mea.gov.in ajanga tongteprateptsü akok, ta MEA-isa metetdaksü.

Ramallah nunga India Representative Office-ia 24-hour emergency helpline tenzükogo aser iba number: +970-592916418 (whatsapp densema) den rep.ramallah@mea.gov.in ajanga tongteprateptsü akok, ta MEA-isa metetdaksü.

Indian Ambassador to Israel, Sanjeev Singla-i, Israel-Palestine tsüingda raraba tensa onoki junga mita repringdar aser sensotem yaritsü atema Indian Embassy lir, ta metetdaksü.

Israel nung India ketdangserisa, "Iba ya Israel nung aliba India nunger sensotem dang nenok kümzüksü aser yaritsü atema Embassy-i maneni inyakdar ta züingpong ashitsü atema lir. Asenok ajaki tensa tamajung ka ajangshidar, ajisüaka süingjema liang, kümdanga mita liang aser security tetuyubatem benshiang ta mepishir. Nenok yaritsü atema onok yangi lir aser onok dang pelaba osang lemsateper ajak dang pelar. Onoki iba tensa junga asadangdar, anungji Embassy-i sangdongba osangtsüsang metetpela liang," ta metetdaksü.

Israel-Palestine tsüingda raraba mapang Israel nung aliba India nungertem linük sepaitem dak tamang katetba lemsateper aser parnoki yimjung nung liner, ta metetdaksüogo.

Osangbener den jembidang Ashkelon, Israel nung alir India tsür, Ilana Nagaukar-i, "Yashi missile kati onok aliba tesem kongshia gari aika nung mi adok aser ki aika nung light oadok. Onok lendong nung lir saka onoki sepaitem dak melung lemteter," ta metetdaksü.

India tsür, Rikki-ia India Ato kilonser, Narendra Modi-i Israel nung alirtem pusema nungitba atema pa dang pelaba lemsateper. Lai, "Ato kilonser Modi-i onok pusemba atema pa dang pelar. Pai onok, Israel aser India nung alirtem atema mapa tajung aika inyaker," ta metetdaksü.

DMK sorkari Israel nung aliba Tamil nunger 84 jangjaogo

Chennai, Mongputeni/October 11 (Agencies): Tang Palestine nunger kiralongrar telok- Hamas aser Israel na tsüingda raraba mapang nung Tamil Nadu sorkari Israel nung Tamil nunger 84 aliba osang jangjaogo.

Tamil nungertemji kar taziingi aoertem lir, kar business inyakerter aser kar raliwalirtem lir. Tang Tamil nungertemji Yeruham, Beersheba, Ben Gurion, East Jerusalem, University of Jerusalem aser Tel Aviv University nung lir.

Tang tashi nungbo Tamil

nungertemji kümzükka dang lir aser chiyungtsü den tejenokdak lir.

Tamil Nadu sorkari Ministry of External Affairs aser Israel nung aliba Indian Embassy naprongla dang Tamil nungertem anir arutsü atema yaridaksüner, ta mepishiogo.

Tamil Nadu sorkarisa metetpelatsü aser teyari agitsü atema helpline numbers: 8760248625, 9940256444, 9600023645 ajanga mesüra helpline email ids, nrtchennai@tn.gov.in aser nrtchennai@gmail.com ajanga tongtepratepang, ta metetdaksüogo.

Rajasthan nung assembly election agitsü anogo melenshiogo

New Delhi, October 11 (Agencies): Anogo ishika tejaklen Election Commission (EC)-i Rajasthan nung Legislative Assembly elections November 23 nü agitsü, ta sangdonga liasü ajisüaka state nung election anogo ana atsülanga November 25 nü ang agitsü telemtetba agiogo.

State nung yimtenren party balalai election anogo melenshitsü mepishiba ajanga election commission-i anogo melenshiogo.

Yimtenren party tem den külemi organisations aikati EC dang November 23 anogo nungji kiyimba sentong aika den loktiliba sentong aika lir, anungji nisung aikati iba anogo nungji

vote magütsütettsü akok, anungji anogo melenshitsüla, ta EC dang mepishia liasü.

October 09 nü EC-i Madhya Pradesh, Rajasthan, Chhattisgarh, Telangana aser Mizoram state tem nung assembly election agitsü anogotem sangdonga liasü.

Rajasthan nung election nung tokteptsüpurtem nomination file asütsü atema tatembangbuba anogoji November 6 asütsü, candidate temi tenüing agentsü atema tatembangbuba anogoji November 9 asütsü, November 25 nü election agitsü aser December 3 nü tanga state tem den külemi vote zünga election osang sangdongtsü.



October 11, 2023 nü Ranchi nung Jharkhand Angh, CP Radhakrishnan-i St.Mary's Church nung Khristan putir Cardinal, Telesphore P Toppo mangjak nung akhüm agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI (OCTOBER) 12, 2023

Kechiba amongnü-ang ?

Tan ita October ka, amongnü linük ajaklen yimkong nübodoka pei alidak aser temeket merüksü ato kilonseri ayongzükba sülen ano tang Mon district kübok Tapi Assembly Constituency nung bye-election agitsüba sentong nung amongnü-ang vote azungtsüsa Election Commission-i latettsüba mapa yagi linük nung Khristan-tem hau ta maliba tangatetba ka sayur. Aya, anogo paika rongnung ya yim nübodoktsüa amonmgnüang shimteter na (?) ta bilema alidang, ano amongnü sentepia mao election agiba vote zünga amongtsübaji Laishibai sayuba anema lir. Iba jagi, Nagaland aser Mizoram state ama Khristan state-tem nungbo amongnübo election-a magitsüla aser vote-a mazungtsüla ta yimten teloktemi metetdaksüogo. Atangji, Khristan masürtem asoshi amongnüji kecha balaka masü, tanga akhi anogo ama ka dang lir, iba jagi junga mebiledmangi anogoji lateter asütsüa akok. Ano külen reprangdangra, Khristan masüyonga shirnoki alima nung tamangba yimsü ajak akümtsübur, item jagibo yimten mapa agi tamanger telok shinga mulung meyrutsüsa sentong yanglur aser anogoa lateter. Atangji, tang ya linük nung Khristan-tem asoshi kodamasüba mapang ka lir, kechiyong government-i amongnü mapa inyaksü latettsübaji manga majung aser angati asünunga, ano ajibo Tsüngrem anema inyakba akümer. Iba tsüngda nungji Khristan-tem kanga mejeper. Aji oda, alima nung senso asünungji yimteni ashiba angatsüla, saka ano yimten dang temaba aser tuluba tashi agi asenok taküm agütsüsangjibo Tsüngrem dang, anungji mamangertem asoshibo kecha mali saka tamangertem asoshibo nisungi ashiba dang nungi Tsüngremi ashiba-ang angatsüla. Ibayongji, kena tangatetba tajung agi yimteni ashiba o a anga aser Tsüngrem külemba mung amongnüa meraksa ta taoba yim nübodok sentongbo October ka melena September 30 nü inyaka mungogo. Aji shitak aser kanga tajung liasü. Iba jagi oagi Delhi nung yimsüsür aser ketdangsertemi angateter alitsü ta bilem, saka taruba ita bye election agiba vote December 3 amongnüang azungtsü latettsüba jagi oagi alirtemi yangi asenoki inyakba ya mereprangteter aser asenoki adokba ola ya mangashir ta sayur. Ibaibo tangar yimten yimsüsür aser lenirtem toktsür, BJP telok nungi adokba Khristan yimten yimsüsürtemi oagi Delhi len BJP senden alidang jembitsüla aser angatetdaksütsüla. Atangji, BJP yagi Hindu yimsü dak alaka tanga yimsübo maginer, aji ajaki meteta lir, kechiyong ibaji parnoki miimshia inyaker masü jakdaka inyaker. Ajisüaka, ibaji metetsümonga BJP telok nung adener, talisa, Khristan purtemji BJP nung adenba agi Hindu nung amai akümtsüba masü saka parnokji BJP telok nung Khristan evangelist amai adentsü tim. Aji oda, BJP Khristan-temi pei jakla aser teindang inyakyim ajanga BJP nung Hindu nungertemjia Khristan akümtsüsa o aser mapa agi Yisu temeim kuli sütettsü tim. Ajisüaka, asenok libaliru aser jakla yimya agi Yisu dak amanger Khristan-tembo memesük mamangertem dang nungi tamajungba aser ochimashiba alir. Iba jagi parnok rongnung asenok mera maket akümer. Iba jagi tangari asenok tamangba yimsüji junger ta mezüngshir. Kasaji, Mahatma Gandhi-ia Khristan yimsü tesayubabo junger saka Khristan-tem jakla aser mapabo majunga ta ashiba tagitsü o ka asenoki teti jembir. Ashi, Khristan-temi Laishibai sayuba ama litet nungbo, ashiko, Mahatma Gandhi-a Khristan kümer lila. Kasaji, tanü BJP nung adener Khristan-temi Khristan mesüka liteta sayu nungbo, Narendra Modi aser Amit Shah nungertema Khristan-sa makümyonga Khristan yimsübo akümtsübuttsü aser Khristan-tema mezüngmeshi masütsü. Ajisüaka, asenoki parnokji Khristan kümdaktsütsü melen meyiper asenokang parnok dang nungi meindangba aser mekümdangba lira, parnok tsüngdang asenokji nisung masü kümogo ta asenoki bilemdi. Aji oda, nisung masü nung kechisütsüba amongnü mapa meinyak amongtsü ? Nisung masü nung kechisütsü Khritmas amongtsü ? Nisung masü nung, tang Manipur nung ama, kasa BJP telok nungisa süaka kati ka taküm maochitepi tepsettepyonga kechi balaka ali (?) ta bilema tangari asenok mezüngmeshir ta asenoki angatetdi. Item amongtsümung ajakji nisungtem asoshi lir, anungji asenoka nisung mesüka pei tamangba yimsü dak amangtetsüla. Atangji, bilemdangdi süra, shibaibo Tsüngremer tsüba nisung ka metsübuttsü ?

OLEMSABANG

Mezüngpur aser tamapur dakji yimli alir

~ L. Kika Pongener.

(Yashi adok nungi...)

Aotsü Aor senso tajungtem...Ajungyonga-majungyonga, asen Ao kinji Naga nung rongnung lenla ajunga nung 'Samanir' kin (Pioneer) ta ajabaji tim dang ajar ako... aji shibai nunga ta ashitsü (?) Anungji asenok-ia iba konang naroküm/tenüng tajungji arr meketdaksüi meraketa wazüka yudi. Tsüngrem oi ashir, "Tenüng tajungji senti mozü dang tajungba" (Sayu-7:1). Aji oda, 'Senti Mozü' nungji teronem tajung lir aser taneptsü lir. Anungji Aotsür Aor alidak tesem ajak nung teronem tajung adokdaksüdi. Aotsür Aor adenba lokti shiranga alidang, Ao kinji taneptsür südi, mepetmesu alidang Ao kinji yimjung apular sudi. Sorkar nungi tenzüker yimden, arogo, mungdang, loktiliba ajak nung ochi inyaka sayurji Ao kin sudi. Ao kinji alima nübur ajak dang tatishitsü tajung sayuba kin sudi. Ao kinji alima kin ajunga dangi osangtajung bener oa sayutsüngiba kin sudi. Ao kini ochi nung tasüita masetshi-i nokdakdi. Aji oda, aji Ao kin asoshi tenung tajungji asütsü.

Aotsür Aor senso tajungtem...Ajioda, tanübo Ao kin temoatsü agi alakba kin ka küma aor asü (?)...ta kanga sasaa bilemer. Otsüla oboula nungeri jembiba..."Mezüngpur aser tamapur dakji yimli alir"...aji shitak lir. Mezüngpur/tamapur dak teti agia pei ajungtsü bilemba aser pei agitsü dang bushiba, ibala shisatsüji malir. Mezüngpur/tamapur jagi ken o-a tanü ajung asaa mejembir, aser mapa-a tanü takok asaa tashiyim agi meinyaker, saka atasaa/aremsüka, tarutsü indang bilema jembir/inaker. Mezüngpur/tamapur jagi tachi-tajemtsü, taki-tarutsü nunga tangar tama chidaksür/agidaktsür-ang parnok agir. Mezüngpur/tamapur jagi ozü lima aser ozü lokti dang jungra ni-ang mechili aser ni-ang mejemli...ta yimli sayur. Mezüngpur/tamapur jagi ozü lima aser ozü telok raksatsü agibo...Ni-ang takoksa aremdi ta pei takoksa aremer. Ajisuaka, kanga tesasatsüka, tanü asen Aor libaliru reprangra...Kin, kidong, telok-telok tsüngda nung...Ozü mezüngpur, ozü tamapur, ozü tambu, ozü tuluba...ta raktepa otsü-olem bushitepa zülutepdang asenok tsüngda temeimtep/yimjung samaa odagi. Asen Ao kin nem tangar kin-i 'Samanir' (Pioneer)...ta tenung tajung jaloktsüba...Iba naroküm tenung asen sasa mekoki kümogo, asenok tambu-su agi mazü kümogo. Atangji, asen Ao kin memelenshira tangar kin matsüngdang menudong kin ka akümtsü. Anungji arung...asenok ajemalua tila kümdi. Tsüngrem o-i ashir, "Ajemaluri alima senmang amongtsü" (T.Ken-37:11).

TSÜNGREM DANG TENZÜKER ALOKBA SARASADEM

~ Bendang Imsong, Mokokchung town.

Oba Tsüngrem, taoba mapangtem nung ne tenzüker kari missionarytemi zülua toktsüba kulitem samadaktsüba ajanga tanü khristan tamanger lokti makmakshishi daktsüba temenen asoshi tatok agüjangma.

Tenzüker o tenzüker na temulungjang ana tener jembishinüba aser aliba ajanga obang meputeper. Aser parnok ochi kuli miimbanga ayur, koba mapa nai sempar, item temenen nai tatok agüjangma.

Ne mapa nung tenzüker karibo mapa nungi anentsü lokti-i lemteta akaba kümsük tongaka lokti nem memetetdaksüi talila inyaksü miimshia sodi memeshiba temenen tatok agüjangma.

Tsüngrem tenzüker karbo sodi agidang pei tangutsü kechi ali iba jagi pai/lai agia aliba sentsüh maotettsüsa mapa toktsüba temenen nai tatok agüjangma.

Tsüngrem aser lokti meranga tenzüker kelen mapa nung sodi agidang, lokti nung ketdangsurtemi sodi agisang/agila tejak repranga sempet agütsüba yimya tamajung asoshi nai tatok agüjangma.

Oba Tsüngrem, item temenen mapatem agi tanü ozü lokti kangshir aser joko tamangertemi pei arogo dak tanang ka mechitetba ajanga tenla aser ter shilema aikati prayer centre aser telok balala nem agütsür. Yamai ne santem mashileni aotsüsa atalokba ya Arogo, Mungdang aser lokti balala nung lenirtem tashi maitba ajanga masü no? Anungji parnok ne O tesayuba ama alitsü aser pei santem tim lenmangi anitsü tangatetba agüjangma.

Oba Tsüngrem, Yonai tatem nung pei temenen ne dang ochi shia nangzükba ama, ne tenzükertemia pei temenen meteta nangzüktsü aser ochi dak azüitsü tangatetba agüjangma. AMEN.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

South Africa nung sayutsüngi tesüdak mapang pastor ka khaset



October 06, 2023 nü Johannesburg, South Africa nung aliba Eagle Christian Center nung Pastor, Dwayne Gordon-i sayutsüngi tesüdak mapang tangokba noksa nung angur.

October 11, 2023: South Africa nung pastor kati sayutsüngi tesüdak mapang nung prangpong amer kari pa khasetba sülen ketdangsertemi bushisüngdang tenzükogo.

Hokolbar aonung (October 06) Johannesburg, South Africa nung prangpong amertemi Tenla ki telungi aier amakba mapang nungji Khristan asem-a yiru.

Arrshi küm 22, Pastor Dwayne Gordon senden ka nung adentsü atema Newlands-i oa Tenla kiji semdanga liasü. Tenla kidangji pai sayutsüngiba mapang nung prangpong amertemi arua pa khaset. Iba sentong ajakji video tangokba mapang nung atalok.

Social media nung iba video ji kanga prokshio. Video nungji pastor sülen tainlonglong lanur anati kongki tanemi atemba mapang nung injang ola angashir.

Pastor Gordon dang nisung aikati 'ainkar' taka ajar. Pai Eagle Christian Center semdanga sayutsüngiba mapang nung nisung trok Tenla kidang jagi aita pa dak injang khaloktsüba sülen Arogo züngsemtem ket nung mobile phones aser senti oset balala rakzükraitem.

Osangbenertem den jembidang African Christian Democratic Party nungji Bishop, Dulton Adams-i,

"Hokolbar aonung atalokba osangji taoksatsüka aser tejashitsüka. Onoki asür kibong züngsemtem aser Arogo nung züngsemtem den mangyim jashi lemsateper. Iba ya temeneni inyakba mapa lir. Pastor Gordon ya lanur dang liasü aser sempet tajung liasü," ta metetdaksü.

Tenla kidang Pastor anasa mena alisang Bishop Randal Coetzee-i, "Ni Gordon anasa mena liasü. Parnok Tenla ki telungi aitba sülen camera nung tama injang khaloktsü, ibayongji camera ji atem nung tsük. Tanabuba nung ano tangar kati anünglen injang khadok," ta metetdaksü.

Mizoram nung Amongnü vote azüngtsü; Khristantemi ashishir

Mongputeni/October 11, 2023: India nung Arogo lenirtemi yimtenren party tem den longjemer Election Commission of India (ECI) dang Khristan nütsüng teimba aliba Mizoram state nung Amongnü vote azüngtsü aliba anogoji melenshiang, kechiyong December 3 ji Khristantem atema temeshi anogo lir, ta metetdaksüogo.

October 9 nü Election Commission of India-i Mizoram densema state pongu nung assembly election agitsü anogotem sangdongogo.

Election Commission-i Mizoram nung November 7 nü election agitsü aser December 3 (Amongnü) vote azüngtsü sangdongogo.

"Mizoram nung ruling party Mizo National Front-i iba anogo ashishiba ama opposition Congress party-ia commission dang Amongnü vote azüngtsü sangdonga aliba anogoji melenshiang ta mepishio,

kechiyong Khristantem atema Amongnüji tekülem anogo lir ta metetdaksüogo," ta Mizoram yimtiba, Aizawl nung aliba Arogo nung Bishop, Stephen Rotluanga-i metetdaksü.

Rotluanga-i, Arogoia October 12 nü election commission dangi shidi ka ajanga vote azüngtsü anogo melenshiang ta mepishitsü, ta ashi.

October 11 nü osangbener den jembidang Mizoram People's Forum nung advisor, Bishop Stephen-i, "October 11 nü Mizoram People's Forum nung lenirtem aser Arogo denominations ajak nung lenirtem senden ka menogo aser election commission dangi shidi zülutsü telemetba agiogo," ta metetdaksü.

October 10 nü Congress state unit Tir, K. Lalsawta aser Mizo National Front Joint Secretary, B. Lalhmangaihuala natia election commission dang vote

azüngtsü anogoji tanga anogo ka dang shimang, ta mepishio.

Mizoram nung nütsüng million 1.1 lir aser nütsüng shilem 90 jungnüabo Khristantem lir. Nütsüng shilem 8 Buddhist nungertem lir aser nütsüng shilem 2.7 Hindu nungertem lir.

State Chief Minister, Zoramthanga-i, vote azüngtsü atema Amongnü shimtetaji Khristantem mezüngmeshiba mapa ka lir, ta shiogo.

Congress state unit Tir, K. Lalsawta-i shidi ka ajanga Chief Election Commissioner, Rajiv Kumar dang, Mizoram nungbo Amongnü anogotem nung official sentongtem magir, ta shiogo.

Northeast India nung Mizoram kidanger states-Meghalaya aser Nagaland nunga Khristan nütsüng teimba lir. State anaprong nung nütsüng shilem 90 jügnüa bo Khristantem lir.

ANOGO ABEN TSÜNGREM DEN

Taidok kü meyong

"Nisung kari kar anema tai agütsütsü lira, nenoki medemer o medemer na talangka aremzüka tai toktepang" Kolosi 3:13

Tekümtet angutsü asoshi tematiba jenjangji temenen taidok angubaji lir. Kari Kibuba Yisu Khristaji kümtetdakba ta amanger, saka tasütsü tonga temenen taidok anguba memeteti lir asür. Tanü azüngba Lai nung temenen taidok angutsübaji asenoki taidok agutsütsü asoshi kodaka bilema lir, iba dak aket ta sayur. Tain makümba Khristan kari asenoki teti taidok nangzükba dak keta lir ta bilemer. Ibaji Lai tesayuba süra, asenoki taidok bushiba nung mapang indoktsüla. Saka temenen shia bilemtetsüji takoktsü asü?

Kolosi 2: 13 nung temenen ajak taidok agütsüba indang ashir. Asenok temenen taidok anguba indang ashir. Asenok temenen taidok anguba tejangjatiba kuliji ibaji lir. Kechiba Tsüngremi taidok agütsür? Temenen taaji tasüba ta asenoki bilemteter. Khristai temenen taaji pa asüba ajanga ajak küpdang, shirnoki amang, parnok ajak nüji kümdaktsü. Khristaji kümtetdakba ta amangba tamang Khrista dak ayuba ajanga, Tsüngremi taochi agi temenen ajak adoker.

Tsüngremi Pai taidok agütsüba mebiletetsü shimtet. Asenoki temenen bilemteta ali tashi tetsübu temenentem asenok nem bilemtetdaksütsü meranger. Taidokji Khrista dak amangba tamang nung amendaker kenyongi adoker.

Gaza Strip nungi Khristantem aika tetsübu nung ajener

October 11, 2023: Israel aser Hamas telok na tsüngda rara tenzükba sülen Gaza Strip nung Khristantemi pei tarutsü tia atema tsübu aika ajener.

Khristan lenir kati, Gaza Strip nung Khristantem meshimeshia samaadoktsüa akok, ta ashi.

Holy Land nung Custos, putir Francesco Patton-i, Palestine nung Khristantemi akokba tashi Palestine litsü toktsür ajentsüa akok, ta metetdaksü.

Pai, "Mapang ajak nung Khristantemi tesünep nung alir. Raraba mapang shia Khristantemi takoksa tuluba angur aser rara tembangba sülen-a Khristantemi takoksa kanga angur. Ozü nüburtem aikati linük toktsür jendar," ta metetdaksü.

"Talisa Khristan nütsüng ishika dang aliba Gaza nung ni parnok atema tsübuttsür. Rara ajanga Gaza nung Khristantem samatsüa akok," ta pai ashi.

"Ni yamaji mesüdaktsüner, saka Gaza nungi mainshira Khristantemi lendong ajurutsü, kechiyong tang tashi nungbo Khristantem kümzüka liaka tarutsü anogotem nung kechi ang ataloktsüar memetet," ta pai ashi.

Honibarnü Hamas teloki Israel amakba mapang nung Israel nung 1,200 shi süogo; tesem ka nungbo kinü tanurtem densema tanur 40 tepset. Iba dak alia Israel nung 2,700 shi yiruogo aser UK nung 17 samaogo.

Iba sülen Israel-i Gaza amakba mapang nung Hamas kiralongrar 1,500 tepsetogo aser Palestine nung 1,055 shi asüba den nisung 5,100 dak tema yiruogo.

Israel-i Gaza mokdangtsü sangdongba sülen electricity, chiyungtsü, tzü aser totzü mokdangogo.

Bodhbarnü Pope Francis-i Israel-i parnok kümzüksü atema nokdaksü parnok dak temeden lir saka ajaki yimjung atema inyaktsüla, ta ayongzük.

Pope Francis-isa Hamas teloki puer aoba Israel nung ajak chioktsüla, ta mepishio.

Pope-i, "Kiralongraba aser alia oa inyakba ajanga Israel aser Palestine tsüngda raraba nung kecha majangzüksü saka tesempa, rara aser mangyangtepba dang kanga bulutsü aser telok anaprongla timtemtsü," ta metetdaksü.

Paisa, "Middle East nung rara masü saka yimjung nüngdaker. Ochi temeden aser ken o jembiba ajanga yimjung yanglutsüla," ta ayongzük.

London nung Cardinal Vincent Nichols-i, "Raraba ajanga kecha mebentetsü. Yimjung atema tanü sarasademjang. Asürtem atema sarasademjang aser pua alirtem tangsa chioktsü atema sarasademjang. Talisa Gaza yimti nung Khristantem atema sarasademjang; tang parnoki kiyongertem teyari agia jenoktsü atema inyakdar," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Sangten

(n) yartsüngsang dang tetsüri tokolak nung tapu tapu enokba (Jewelleries worn during dancing)

* Tetsürtem kolak nung sangten enoker tsüngsangbaji topur kanga junga angur.

Sangtennü

(n) hapta nung anogo tasemnübuba (Tuesday)

* Taruba Sangtennüji October 17 asütsü.

OLONG PAITEP # 6664

Grid for Olong Paitep # 6664 with numbers 1-17 placed in specific cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6663 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.


LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

NAI-A YA METETTER MA

BOLLYWOOD MOVIES 2023 TAJUNG TIBA 10:

- All That Breathes
Khufiya
Gold Fish
Ghoomer
OMG 2
Sirf Ek Banda Kaafi Hai
Kathal: A Jackfruit Mystery Shiv Shastri
Balboa
Daman
Ghospaith: Between Borders



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Mizoram Speaker Lalrinliana Sailo-i BJP nung adener



Aizawl, October 11, 2023

(Agencies): Mizo National Front (MNF)-i tang teinyakdak assembly speaker Lalrinliana Sailo nem party ticket agütsütsü memulungba ajanga pai BJP nung adentsü.

November 7 nü Mizoram assembly elections agütsü aliba jakdang MNF-i ano tetsükdaksü ka ajuruogo ta BJP spokesperson kati ashi.

Brihostibarnü Sailo-i Mizoram BJP nung züngsem akümsü ta Mizoram BJP media convener Johny Lalthanpuia-i ashi.

Taruba assembly elections nung Sailo-i BJP ticket amer tokteptsü saka party lennirtemi pa koba constituency nungi tokteptsü ano telemtetba magi ta Johny-isa ashi.

Mizoram assembly elections

agütsü jakdang Sailo züngsema MLA 8-i menden nungi anenogo.

2018 küm Sailo-i Chalfilh assembly constituency nungi MNF ticket amer toktepa takok ngua liasü.

Pai MNF-NDA lenisüba anema jembiba atema pa nem party ticket agütsütsü memulunger ta osang angazüker.

Tripura CM-i Durga Puja benjung atema sen mesarutsü tuyur

Agartala, October 11, 2023

(Agencies): Durga Puja jakdang Tripura Chief Minister Prof. Dr Manik Saha-i Police dang benjung tenüng tashiyim nung sarusajirtem merenshitsu tetuyuba agütsüogo.

Nagicherra nung 'Fish Transshipment Yard' lapoktsüdang Dr. Saha-i iba osang metetdaksü.

'Nisungtemi lenmang nung gari anendaksür tashiyim agi sen saruba angudang ni jashir. Iba inyakyim ya ozüngi

Puja tenüng amer sen saruba angudang temulung raksar. Iba ya kechi sobaliba?" ta Dr Saha-i asüngdang.

'Fish Transshipment Yard' ya Rs. 3.50 crore endoka yanglu. Iba ya Special Plan Assistant, Agartala Municipal Corporation aser Rural Development Department teyari ajanga yanglu.

Iba facility ajanga Agartala yimti nung traffic timtem ajema akümsü aser shishilembadak merüka yutettsü ta Chief Minister-i ashi.

"Asenoki forest land ya modernized city ama mekümtettsü kechiyong asen lima nung ali 67% tashi arem lir. Arem maliba tesemtem asenoki renloker. Fish Transshipment Yard atema ali ya 2017 küm agütsü saka ozü sorkar akümba sülen ang mapa tenzük" ta Dr Saha-i ashi.

Prime Minister Narendra Modi aser Centre o state nung BJP-i aniba sorkartem ajanga terenlok bener arur, ta paisa shisem.

AGP aser BPF lennirtemi Congress nung aden



Guwahati, October 11, 2023

(Agencies): BJP den yariteper Asom Gana Parishad (AGP) aser Bodoland People's Front (BPF) lennirtemi Assam nung Congress nung denogo.

AGP aser BPF lennirtemi Bodbarnü Rajiv Bhawan, Guwahati nung Assam Congress nung züngsem aküm.

Prabin Boro (BPF), Pranay Rabha (Gana Shakti Party-GSP), Mahim Hazarika (AGP), Hilaluddin Barbhuyan (GSP), Tilak Phukan (AGP) aser Brajalal Rabi Das (BJP) nungeri anir lennir balalai Congress party nung aden.

Iba sentong nung Assam in-charge Jitendra Singh, MP

Gaurav Gogoi, MP Pradyut Bordoloi, Assam Congress president Bhupen Borah aser Congress lennir aika aden.

BJP sorkari ayongba "Amrit Kalash Yatra" nung adenba atema Assam Congress-i lennir ana party nungi anentsüba sülen tanü AGP aser BPF lennirtemi Congress nung denogo.

GOVERNMENT OF NAGALAND

DIRECTORATE OF HEALTH & FAMILY WELFARE NAGALAND:: KOHIMA.

NO.DHFW-5/TRG/PMTI/2019/4394-95

Dated, Kohima the 11th Oct' 2023

NOTIFICATION

In Pursuance of this Directorate Advertisement No.DHFW-5/TRG/PMTI/2019/4116-20 Dated Kohima 15th Sept' 2023 and vide Government Order No.HFW(A)-12/132/2021/741 Dated Kohima, the 11th Oct' 2023, the list of Selected Candidates and Waiting List to undergo B.Sc MLT at PMTI, Kohima for the session 2023-2024 can be downloaded from the Department's Website nagahealth.nagaland.gov.in and PMTI Office Notice Board.

*Admission date 13th October-21st October 2023.

(Dr. RITU THURR) Principal Director Directorate of Health & Family Welfare Nagaland, Kohima.

Afghanistan nung ano menoknok ka anak



Afghanistan nung tanaben menoknok anakba agi raksatsür aliba tesem ka noksa nung angur.

Kabul, Mongputeni/October 11 (Agencies): Afghanistan anüolen ano menoknok magnitude 6.3 magnitude tesashi anoka liasü. Honibarnü menoknok tesashi ka anoka nisung meyirejang dak tema asüba sülen anosoh ishika lir Bodhbarnü iba menoknok anakogoo.

Iba menoknok yagi Herat province yimtiba Heart anasa tesem ka dak Bodhbar anepdang kongshia liasü.

Heart Angh office sangdong ka ajanga ashiba agi, taoba menoknok agi anoksatsür aliba tesemtem nung takoksa tulu ajuruogo.

Bodhbarnü menoknok lendong nung nisung 80 yirugo

asener anentsüh aluba ajanga Herat-Torghundi highway tongtiba anembangogo, ta Ministry of Information otongdar Abdul Wahid Rayan-ashiba Associated Press sangdong ka ajanga metetdaksü.

Iba menoknok yagi Chahak yimtsüing nung ki 700 aliba ajak ajasatsüogo. Iba yimtsüing ya Honibarnü menoknok anakba mapang mekongshi-i liasü ta AP-isa metetdaksü.

Taoba Honibarnü 6.3 magnitude menoknok ka aser aftershock tem agi Afghanistan kanga mejungi konshir nüburtem timtemtepa aliba mapang ano Bodhbarnü iba menoknok yagi kasa tesem kongshiogo.

Honibarnü menoknok lendong nung nisung meyirejang ka dak tema asü aser meyirejang aika yirua liasü, koba kümtem tsüingda Afghanistan nung anakba menoknok tesashitiba liasü, ta Taliban ketdangsürtemi ashi.

Tekümzükertem aser volunter tem yimtsüingtem ajar alibatem nung taküm alirtem aser tasüingtem taoba hopta tatemlen nungi tanenmakai bushia arudar.

Küm aika rara nung aliba den bendangertemi teyari agüja aliba anenba ajanga Afghanistan nung infrastructure kanga mejungi lir aser iba ajanga teyari agütsütsü asoshi inyakyim nung tetsükdaksü adoker.

SANGDONGER

Mr. Imtingangnen Longchar S/o Lt Meyayungdang Longchar Yimjenkimong, yimkong Süngsama telemteba nung tashi mangaba ajanga Yimjenkimong sobaliba nung ajemdaker tatsü talang ajak jembir 5th oct 2023 anogo Ajuzen züingar ajanga ayungzükba Süngsama ajanga telemteba agia liasü. Yimjenkimong yimden yimli nung maliba mapa inyaka yimkong Süngsama lemtet anema inyaka Additional Deputy Commissioner Office Mangkolemba nung koba complaint aguja ali, ibaji 10th oct 2023 anogo tashi nung withdraw asütsü mapang agütsü. Latetsüba anogo tashi nung Mr. Imtingangneni tashi manga nung Mr. Imtingangnen aser par kibong küm 30 (putu ka) yimdak nungi aritoker. Iba mapang pa aser par kibong yimer lushi nung tetsüing majemoktsü. Tashi mangai arua senzüba putetra temerenshi tolu alitsü. Küm semerji (30) mabensadang pai pa aibelen angateta yimer densa külemi arua linüra Ak mar asem (3) senji achitsü aser iba case dak sentakaba expenditure ajak pai (Imtinganganeni) menoktsü. Iba sülenjiang yimdaki anioktsü. Iba sangdong nung karidanga timtem agütsüba metetra süngsama ajanga tapet temerenshi alitsü.

Mr. Marliba Süngsama seasonal Chairman
Mr. J. Tali Pongen Süngsama seasonal Secretary

China-i Australia tsür Cheng Lei chiokogoo

Melbourne, Mongputeni/October 11 (Agencies): Osangbener Cheng Lei, küm asem China nung tepuokdak aliba sülen Australia nung kidangi meyipa ogo.

"La airport nung Foreign Minister Penny Wong-i agizüka liasü," ta Australia Ato Kilonser Anthony Albanese-i, la chiokba sangdongba mapang ashi.

Arishi küm 48 tain Cheng Lei ya China indang state meyong English oshi TV station CGTN nung business reporter ka ama inyaka aliba mapang 2020 küm August 13 nü apu.

Iba sülen mapang tatsüka lir la ya ozüing alema state indang miim osang bendangleni yokba atema aija liasü.

Lai aitsüba ya yimjak nung

memetdaksü liasü.

Canberra aser Beijing na tesendaktep tajungba küma aoer ama reprangtetba mapang ka nung Cheng ya chiokogoo. Covid wara pokteter aliba mapang linük ana tsüingda tesendaktep tamajungba aküm aser iba ajanga China-i Australia nungi nagmati aser süngpak amala bener arua aliba nokdanga liasü. Item tenokdangbatem ya taküm küm tetenzüklen lapoktsüogo.

Bodhbarnü Cheng chiokba sülen PM Albanese-i ashiba agi, iba ajanga linük ana tangatetep nung aliba mapang pai taküm China semdangtsü.

Paisa, Cheng ya Melbourne nung lar tanur ana den longjemogo.

(Maneni tapak 8 nung...)

Gaza power plant nung totzü agimar, nisung asoshi lendong tulu asütsü

Gaza, Mongputeni/Oct. 11 (Agencies): Gaza nung electricity ketdangsürtemi ashiba agi, tesem ajaklen nungi lungbanga aliba Gaza nung power plant ka dang aliba ya tenokdangba balala agüja aliba mechi ghonda ishika tsüingta totzü agimatsü aser iba Palestinian territory nung electricity malitsü. Gaza nung yimsü asüba telungpur telok, Hamas-i tawa amakba tayang kepzüka Israel-i supply ajunga nokdanga lir.

Palestinian Energy Authority Chairman Thafer Melhem-i Bodhbarnü Voice of Palestine radio dang ashiba agi, nütstüing yongsük million 2.3 shi aliba Gaza nung iba plant ya nikongdang shibangtsü akok.

"Iba ya ajanga Strip ya tammang akumtsü aser takum kumzüksü service agütsütsü tamakoktsü akumtsü, kechiaser item ajakji electricity nung metaloka lir, aser Rafah Gate nungi totzü bener aruba nokdanga lia generator mamshitetsü," ta Gaza ketdangsüri Bodhbarnü sangdong ka nung shia liasü.

"Iba tensa yagi Gaza Strip nung meimchir asoshi timtem tulu adokdaksütsü," ta ashi.

Kasa sangdong nung Israel-i tayang kepzüka ya lungjem



Hamas teloki tesem balala nungi Israel maker anogo ana lir Israel bhukuma Paris nung yimtung süa jajaba sülen Eiffel Tower nung Israel nisan sentsü yalokja aliba noksa nung angur.

tashi mait civilian tem nem temerenshi agütsüba lir, ta ashi. Parnoki linük balala dang meimchir anema mapa tamajung inyakba anendaksütsü asoshi tekeraba nung arakzüa mera agitsü ayongzüka liasü.

Kasa mapang Health Minister Mai al-Kaila-ia Gaza Strip mozüki tem nung generator amshitsü asoshi totzü rizünga aliba asüing, Brehostibarnü tembangtsü aser mozüki nung tensa tamajungba ajumtsü, ta ashi.

Gaza arütsü alema senzüba tesem ajunga shibangogoo, anungji power plant mesüra generators asoshi totzü bener arutsü tamakoktsü kumogoo, kong nüburtem aser mozüki mapang talangka metaloka liasü.

Honibarnü Hamas züingsemtem southern Israel telungi aita azüdokshiba nung telangzüba agüja meyiper amakba nung shilem ka ama Israel-i Gaza nem agütsüba electricity supply ajunga Hombarnü shibangja liasü.

Israel nungeri occupied Gaza Strip nung tenokdangba agüja aliba ya 2007 küm June ita nungi lir. Gaza indang airspace aser tziyüm, aser ano arütsü alema senzüba tesem asem nungi ana Israel-i azüoka lir aser tasembuba ya Egypt-i azüoka lir.

Palestinian Islamist group Hamas den raraba mapang Israel sepa 169 junga süogo, ta army temi Bodhbarnü ashi.

"Tanep tashinung IDF (army) sepa asür kibong 169 nem onoki osang agütsüogo aser

ano nisung 60 pua bener Gaza-i aoba kinungertem dena jembiogo," ta mitkar indang odongtar Daniel Hagari-i osangbener dang ashi.

Tesüiba anogo ana tsüingta Gaza telungpur arütsü alema aitba mali, saka telungpur tasüing noklang aika arütsülen nungi bener mao lir, ta pai ashi.

"Iba ya ajanga par nukla sayur. Par nukjidong ya litsü makdoktsüba dang lir, parnoki maker Gaza-i meyipa aotsü sentong meliasü," ta pai ashi.

"Alu nung nisung aika lir... Tesüiba anogotem onoki kiralongrar 18 tepsetogo."

Hamas telungpuri Honibarnü nungi Israel amakdang nisung 1,200 asüba jangjaogo. Iba tayang kepzüka Israel-i Gaza nung tayimtsü aser injang-bomb tesashi amshia amakdang yangjia nisung 1,055 takum samaba aser nisung 5,000 yiruba osang lir.

Israel bhukumer ta sayua United Kingdom indang foreign secretary James Cleverly Israel-i ogo, ta UK foreign office ajanga Bodhbarnü ashi.

US Secretary of State, Antony Blinken-i pa Brehostibarnü Israel tonga aotsü ta sangdonger sülen British ketdangsür ya Israel semdangi aor alitsü.

NSF Memorial Trophy: Liangmai FC final-i iogo



Kohima, Mongputeni/October 11 (TYO): Liangmai Football Club, Manipur-i tanü 23buba NSF Martyrs' Memorial Trophy nung defending champion New Market FC koka final-i iogo.

Bodhbarnü mezüngbuba semifinal asaya nung New Market FC nungi tongtibang asayar striker Rhitsho Mero aser midfielder Aloumai Panmai na maliba meteta parnok kanga timtema liasü. Team source ka

ajanga ashiba agi, tenaprongla Silchar Super Division nung asayadar.

Liangmai FC ya tang agi tanabenbuba iba asayamung nung shilem agir aser taküm iba asayamung akoktsü imlaba team rongnung ka lir.

Asaya nung team kati danga minute 45 tsüingda goal ka danga midaktsüteti liasü. Asaya tanabuba shilem nunga team kati danga asayamung amokbanger masayateti arur

minute 87buba nung Lamsanggin Hangsing (27)-i Liangmai FC atema goal ka idakja parnoki asaya akok.

Asaya atema Hangsing nem man of the match naroküm agüja liasü. Iba naroküm ya match patron, 1st Class Contractor Kezhaleo Rülho-i agüja liasü.

Tanabuba semifinal asaya October 12:
Red Scars vs United FC Piphema @ 5PM.

Asian Champions atema India tetsür hockey team sangdongogo

Mongputeni/October 11, 2023 (Agencies): Taruba tetsür Asian Champions Trophy (ACT) hockey atema India team nung asayar 20 sangdongba nung asayar tejen Sushila Chanu züngoksema mali. La Anterior Cruciate Ligament (ACL) yirur alitsü ta bilemba ajanga team nung mezüngoksem.

Sushila, shiba lenisüba nung India team Rio Olympics nung asaya liasü, la taoba hopta Hangzhou Asian Games nung bronze medal anguba India tetsür team nung züngoksema liasü.

Hockey India source ka ajanga ashiba agi, Sushila kechi yirur ali aji jangjatsü atema yakta doctor den ajuruteptsü.

"Sushila anisüingzükda tsüogö kechiyong la ACL yirur alitsü ta bilemer. La doctor kati temang tendangtsü nungdaker. Sushila ya team nung tongtibang züngsem ka lir aser asayamung

tongtibangtem masaya tsüingda la anema alitsüji kanga tongtibang," ta source-i PTI dang ashi.

Sushila melena team nung Baljeet Kaur züngoksemogo.

Asian Champions Trophy ya Ranchi nung October 27 nungi November 5 tashi asayatsü.

Vaishnavi Vitthal Phalke shiba Asian Games squad nung züngoksema liasü la aser Sharmila Devin a replacement asayar ama shimogo.

Team ya goalkeeper Savita lenisüba nung asayatsü aser defender Deep Grace Ekka vice captain asütsü.

Squad nung Bichu Devi Kharibam tanabuba goal keeper asütsü aser Nikki Pradhan, Udita, Ishika Chaudhary, aser Deep Grace nung defence nung asayatsü.

Nisha, Salima Tete, Neha, Navneet Kaur, Sonika, Monika, Jyoti, aser Baljeet nung midfielder nung asayatsü aser Lalremsiami, Sangita Kumari,

Deepika, aser Vandana Katariya nung striker asütsü.

Iba asayamung nung India den Japan, China, Korea, Malaysia aser Thailand nung shilem agitsü.

Iba asayamung nung India team mezüngbuba October 27 nü Thailand den asayatsü aser iba sülen Malaysia (October 28), China (October 30), Japan (October 31) aser Korea (November 2) den asayatsü. Semifinal aser final November 4 aser 5 nü asayatsü.

India team:

Goalkeepers: Savita (captain), Bichu Devi Kharibam
Defenders: Nikki Pradhan, Udita, Ishika Chaudhary, Deep Grace Ekka (vice-captain)
Midfielders: Nisha, Salima Tete, Neha, Navneet Kaur, Sonika, Monika, Jyoti, Baljeet Kaur
Forwards: Lalremsiami, Sangita Kumari, Deepika, Vandana
Katariya Replacement players: Sharmila Devi, Vaishnavi Vitthal Phalke.



Nagaland Sepaktakraw Association aser asayartemi Sezovelu Dozo aser Seyiekhrieno Tapa na Dimapur airport nung agizükba noksa nung angur. Sepaktakraw asayar ana ya tawa Hangzhou China nung tembangba 19buba Asian games nung shilem agia liasü.

Vinoo Mankad Trophy atema Nagaland team sangdongogo

Dimapur, Mongputeni/October 11 (Agencies): Nagaland Cricket Association-i Vinoo Mankad Trophy 2023-24 atema Nagaland tebur U-19 team sangdongogo.

Team nung asayartem yamai alitsü:

1. Yugandhar Singh (C), 2. Seyievizo Zaputou, 3. Lunthu Martin, 4. Jenithung S Ezung, 5. Neizolie Metha, 6. Jesevilie Dzeyie, 7. W Thechamo Odyuo, 8. Vishal Sahani, 9. Anil Gupta, 10. Toshimanen, 11. Akesho Jishing, 12. Moatemsu, 13. Samir Ali, 14. Angukato Chishi, 15. Thepuluzo Lohe,

Support staff:

1. Dziasevotuo John Belho-

Team manager/Asst. coach
2. Vijay Kumar Madyalkar- Head coach
3. Sunil Kumar - S&C coach
4. Neiphreo Yhokha- Physio

Fisture:

12th Oct. 2023: Nagaland vs Baroda
14th Oct. 2023: Nagaland vs Sikkim
16th Oct. 2023: Nagaland vs Kerala
18th Oct. 2023: Nagaland vs Madhya Pradesh
20th Oct. 2023: Nagaland vs Punjab
Asaya ajak Saurashtra (9:00 AM) nung dang asayatsü aser Livescore update bcci.tv nung angutsü.

PDVFA-i selection camp indang metetdaksü

Kohima, Mongputeni/October 11 (TYO): Taruba 11buba Nagaland Veteran Football Association Championship atema Phek District Veteran Football Association (PDVFA)-i ayongzükä Phek jila nung October 27 nü selection camp ka akatsü.

Iba asayamung ya November 27 nü nungi tenzükä asayatsü.

PDVFA General Secretary, Suyieveto Lohe-i sangdong ka ajanga, October 26 nü camp nung shilem agitsü atema tenüing züngoksemsü ta metetdaksüba den camp nung shilem agitsü jangrar ajak dang iba tetuyuba

sülen tashi anga anidaktsü metetdaksüogö.

Camp nung shilem agitsü jangrartem ya arishi küm 45 tema asütsüla aser tenüing züngoksema mapang Adhaar Card sayutsü nungdaker. Asayartem ajaki parnok indang sports Kits tem bener arutsüla aser camp agiba tesem peisasa taa intoka tonga arutsü nungdaker. Atakzükja aliba anogo tenüing züngoksemsüla aser iba sülen arurtem magizüktsü. Osang tejangjaba agitsü atema item number 96122 27780 / 87877 52062 nung tongteprateptsü, kasa sangdong ajanga metetdaksüogö.

China-i Australia tsür...

(Tapak 7 nungi...)



Cheng Lei

"Lar kinungertem küm ishika kanga timtema aliba la meyipa aruba ajanga tembangtsü. Sorkari mapang talang ka merangdanga aruogo aser la meyipa aruba ya par kinungertemi dang masü saka Australia nung ajaki pelashishia agizüktsü," ta Albanese-i ashiba den lai Bodhbarnü Cheng den phone ajanga jembiogo, ta shisem.

Paisa, la indang ken o ya China nung legal inyakyim ajanga tembangogo.

China nung la apuba sülen Cheng ya mezüngbuba ita trok tashi taitsuba kecha makai solitary confinement nung ayu.

March ita la China nung okadak ka nung miima

obendanga liasü. China dangi Australia ambassador Graham Fletcher-i okadaki aitsü merangdang ajisüaka takok mongutet. Lar kinungertemia la kechi atema aitsü aji mejangjai liasü.

China indang Ministry of State Security-i Bodhbarnü ashiba agi, Cheng küm ana ser ita 11 tepuokdak aliba sülen yokogo. Lai okadak aibelenba nangzükogö, ta kasa sangdong ajanga metetdaksü.

Cheng ya China nung aso aser la arishi küm 10 asüba mapang tebu PhD agitsü atema Melbourne, Australia-i oa liasü. Iba sülen la 2012 küm China-i meyipa arua CGTN nung mapa inyak tenzük.

BILEMDANGANG

"Aremzükä inyaksangshiba nung teti temoatsü lir."